

## ZUBILLAGA BASERRIAREN GAINEKO MOZIOA

Badira urte batzuk Lasarte-Oriako Urnieta bidean dagoen Zubillaga baserrian kalteak agertzen hasiak direla, Zatarain urbanizazio berriaren lanak egiteko baserriaren alboan doan GI-3832 errepidetik pisu astuneko kamioiak igarotzen hasi zirenetik, hain zuzen.

Baserri azpiko pisura ura sartzen da erruz eta eraikinean oso agerikoak diren hainbat zartadura eta haustura agertu dira. Guzti honek Zubillaga baserrian bizi diren pertsonak oso egoera zailean jarri ditu euren baserriaren segurtasuna kolokan ikusten baitute.

Jabeek aurkeztu dituzten hainbat txostenen arabera, GI-3832 errepidetik Zataraingo lanetara joan etorrian dabilzan pisu handiko kamioek errepidean eragindako kalteak eta errepidearen oinarriak baserriari eragiten dion presioa da baserriaren kalteen erantzule.

GI-3832 errepidearen jabea Gipuzkoako Foru Aldundia da, errepide horretatik 15 tonaz gaindiko kamioiak ezin dute ibili, baina Zataraingo Urbanizazioko lanetarako, Gipuzkoako Foru Aldundiak pisu hori gainditzen duten kamioiak errepide horretatik ibiltzera baimendu ditu.

Zubillaga Baserriak dituen kalteak direla eta, Lasarte-Oriako Udaleko Bulego Teknikoak egindako txosten baten arabera.

- Urnieta norabidean ezkerreko aldean, errepideak ura jaso eta bideratzeko sistemarik ez du. Hori dela eta, argiteriaren kutxatila urarentzat hustubide bihurtzen dira. Honek ur pilaketa handiak eragiten ditu, eta dagoen pendizarekin batera baserriaren azpiko aldean ura sartzea eragiten du. Horri errepidearen eskuineko aldean, ura jaso eta bideratzeko sistema guztien egoera tamalgarria gehitu behar zaio, non bertan pilatzen diren urak ezkerreko aldera igarotzen diren, eta ezkerreko alde honek esan den bezala ura jaso eta bideratzeko sistemarik ez duen.
- Jabeek aurkezturiko txostenetan agerikoa da eraikinak berak errepidearen euskarri lanak egiten dituela. Horrela, errepidearen gainkargak eragiten deun presioak eraikinean eragin zuzena du.

Hau horrela izanik, Gipuzkoako Foru Aldundiko Bide Azpiegituretako departamentuari eskatu zaio, alde batetik, errepidean ura jaso eta bideratzeko lanak egin ditzala errepidearen bi aldeetan, eta bestetik, errepidean egin ditzala egin beharreko lanak Zubillaga baserriak errepidearen euskarri lanak egiteari uzteko, horrela eraikinaren oinarrien degradazio jarraituarekin bukatzeko.

Foru Aldundiko Bide Azpiegituretako departamentuak Udalaren eskaerei erantzunez, nahiz eta euren txostenetan ere onartu baserriak errepidearen euskarri lanak egiten dituela, Udalak egindako eskaerari entzungor egin dio eta sortu den egoera larriaren erantzukizuna ukatuz, arazoa konponduko luketen lanak egiteari uko egin dio.

Zubillaga baserriaren egoera larria ikusirik, eraikinaren eta bertan bizi direnen segurtasuna lehenetsiz, Lasarte-Oria EH Bildu Udal Taldeak honako erabaki hauek onartzea eskatzen du:

1. Gipuzkoako Foru Aldundiko Bide Azpiegituretako departamentuari erantzukizuna onartu eta kalte handiagoak izan aurretik, modu urgentean Zubillaga baserria babesteko GI-3832 errepidean egin behar diren lanak egitea.
2. Zubillaga baserrian jazotako kalteak Zatarain Urbanizazioko lanak burutzeko tona handiko kamioien joan etorrien ondorioz izanik, eta Gipuzkoako Foru Aldundiko Bide Azpiegituretako departamentuak egin behar dituen lanak burutzen ez dituen bitartean, Lasarte Oriako Udalak Zataraingo lanak burutzeko baimena berrikustea eta etorkizunean onartu daitezkeen baimenak Zubillaga baserriaren segurtasuna kontuan izanda ematea.
3. Lasarte-Oriako Udalbatzarreko erabaki hauek Gipuzkoako Foru Aldundiko Bide Azpiegituretako departamentuari helaraztea.

*Lasarte-Oria EH Bildu*